

# To'on yó'o kían mií noó ni taa San Pablo ni sa'an noo Timoteo

## Ká'an Pablo ndisá'án xí'ín Timoteo

**1** <sup>1</sup> Yu'u kúú Pablo, ta kúúí iin apóstol, na né'e to'on Jesucristo, chi mií tatá Ndios, na dákaiki ñaá, xí'ín sato'o yo Jesucristo, na kúú iin tandeé iní ká'ano noo yo, noón kúú na ni xi'o choon yó'o nooí.

<sup>2</sup> Ta ká'an yu'u ndisá'án xí'ín yo'ó, Timoteo. Mií'an ndaa kuiti kúúón táto'on de'i sa'á ña kándéé inon Jesús. Ta mií tatá yo Ndios xí'ín sato'o yo Jesucristo ná kee na ña maní xí'ín yo'ó, ta ná ku'u ini na sa'on, ta ná kí'o na ña koo va'ón.

### Ta yó'o ketí'a Pablo ká'an na sa'á ña to'ón dána'a dao ka taa

<sup>3</sup> Kakaá ij ní ñoo Éfeso xa'an, táto'on ni seí nda'avíi nooon tá ni keei kua'in chí kuendá Macedonia di'a, ta ka'andon choon noo ra dána'a ña to'ón ña ná dá'a ka ni kee ra dión, <sup>4</sup> ta ná dá'a ka ni dána'a ra sa'á cuento yatá, xí'ín sa'a ndá tixi ni kii iin rá iin na yatá ni sa ndei sa na'á. Chi ña yó'o kédaá xí'ín na kúú kuendá Jesús, dá kasá'á ná dándichi tá'an mií ná, ta ko chindeé ta'on ñaá ña kaka choon Ndios kua'an, chi ko xí'oan ña kandeé cháa ka ini na Ndios. Ta ká'in xí'ón ña <sup>5</sup> ka'andon choon yó'o noo taa ñoo, dá ná katí'a ñayuu xa'an ku'u ini sa'a sátá'an na xí'ín iin nío vii, xí'ín iin ñaxintóni va'a, ta sa'á ña kándéé iní na Jesús xí'ín ndino'o ini na. <sup>6</sup> Tído ni kankuei xoo va taa ñoo noó ña yó'o, ta ndí'i ini ra dána'a ra sa'a to'on ko chón. <sup>7</sup> Ta katóo ra dána'a ra sa'a ley Moisés, tído ni mií rá ko kándaá ini sa'á ña dána'a ra xí'ín sa'á ña kéndaa téi ra.

<sup>8</sup> Ta sa ná'á vá yó ña keva'a yó xí'ín ley Ndios tá ná kendaá yo choon sa'ándaan. <sup>9</sup> Ta ná'á vá yó ña ko ní xi'o Ndios ley na ña kían chituuán noó ñayuu ndaa. Di'a ni xi'o na ley na chituuán noó ñayuu kíni, xí'ín na do'ó, xí'ín na ko nákoní Ndios, xí'ín na kée kuachi, xí'ín na koó ñañó'ó noo Ndios, xí'ín na ká'an ndava'a sa'a Ndios, xí'ín na sa'ání tatá xí'ín naná, xí'ín ndidaá ka na sa'ání ndij, <sup>10</sup> xí'ín na kée kuachi xí'ín na ko kúú yíi o ñadi'í, xí'ín ra katóo kudí xí'ín taa xi'ín rá, xí'ín na díko ñayuu, xí'ín na to'ón, xí'ín na náchina'á Ndios tein ña to'ón ká'an na, xí'ín dao ka kuachi ko náki'in tá'an xí'ín ña ndaa dána'a yo. <sup>11</sup> Kí'o dión dándáki to'on ndato, ña kúú to'on va'a sa'a Jesús, ña ni chiná'a Ndios, na kúú Ndios ndato kua'a ió. Ta ni sa'anda na choon nooí ña dána'i ña noó ñayuu.

### Yó'o kásto'on ta'ani Pablo sa'a choon ni natiin na noo Ndios

<sup>12</sup> Náki'oi ndivé'e noo Cristo Jesús, na kúu sato'o yo, na xí'o ndeé yu'u noo choon yó'o. Chi ni sa nde'é ná yu'u ña kúu iin taa ndaa, sa'a ñoó ni xi'o na choon yó'o noo kechóoin noo mií ná. <sup>13</sup> Ta va'ará ni sa kuu yu'u iin ra sa ka'an ndava'a sa'a ná, ta va'ará ni sa kuu yu'u iin ra sa kendava'a xí'in na kúu kuendá na, ta va'ará kini sa ndane'e yu'u na, tído ni ku'u va ini na sa'í, chi ko ní sá na'á ta'an vei ña ni sa keei, ta ko ñá'a kandísai mií ná. <sup>14</sup> Tído ña maní ni kee sato'o yo Ndios xí'in ni sa kuu iin ña ká'ano nda'o nooí, chi ni nakutí yu'u xí'in ña kándéé inií ná, xí'in ña kú'u inií sa'a dao ka ñayuu. Ta dión ni ndo'i ni kee Cristo Jesús.

<sup>15</sup> Ta ndino'o ña ndaa kían ko'in ka'in, ta kánian kandísa ndidaá ñayuu ña. Ta ña yó'o kían: miían ndaa kuiti ni kii Cristo Jesús ñayuú yó'o, dá kuu dákaki na na kómí kuachi, ta yu'u kúu ra kini cháa ka nákaa tein na kómí kuachi ni dakáki na. <sup>16</sup> Tído ni sa'an Jesucristo ni ku'u ini na sa'a yu'u, ra kini cháa ka, dá dána'a na noo ñayuu ña ko'on na ki'o ndeé ini na sa'a ñayuu kándísa ñaá, dá koni na natiin na ña kataki chíchí ná táto'on ni kee na xí'in yu'u. <sup>17</sup> Ta iin tó'on mií vá Ndios kúu rey ndidaá tá'an tiempo. Ta ni iin ku'u o kuú na, ta o kúu ta'on koni yo ndi káa na, ta kúu ná iin tó'on diní Ndios takí xí'in Ndios ndichí. Ta daá kuití ná natiin na ndidaá ñañó'ó, xí'in to'on ndato kua'an. Dión ná koo.

<sup>18</sup> Ta choon yó'o xí'oi noo yo'ó, Timoteo, dá kandeéon naáon xí'in ña kini, táto'on ki'o kua'an to'on ni ni'i na sá'ano noo Ndios tá sa na'á sa'a choon keeón. <sup>19</sup> Ta kuiin ndaaon xí'in ña kándéé inon Jesús, ta cho'on inon koo vii ñaxintónon, dá chi sa'a ña ko ní kée dao ka na kúu kuendá Jesús dión, sa'a ñoó ni tuú ná noo ña ndaa kándísa yó, táto'on ki'o ndó'o iin barco túu tá'an xí'in yuu. <sup>20</sup> Ta Himeneo xí'in Alejandro kúu dao taa ni ndo'o dión, ta ni nakí'o va yu'u ra noo ndá'a ña u'u, dá ná nandikó inií ra, ta ná dándí'i ra ña ká'an ndava'a ra sa'a Ndios.

### Yó'o ká'an Pablo ña ná kaka yo ña maní noo Ndios sa'a ndidaá ñayuu

**2** <sup>1</sup> Noo ndidaá ña'a ká'an ni'inii noo ndidaá na ndéi xa'an ña ná koo ini na kueí nda'í na noo Ndios sa'a ndidaá ta né'e choon, ta ná kaka ta'i ná noo ná sa'a rá, ta ná kaka na ña maní sa'a rá, ta ná nakí'o na ndivé'e noo Ndios sa'a rá. <sup>2</sup> Ta dión ta'ani ná kaka na ña maní noo Ndios sa'a tá né'e choon ná'ano, xí'in sa'a dao ka taa né'e choon xi'in rá, dá kían ná koni yo kandeí va'a yó, dá ná koni yo kandeí ñóchí yó kee yó ña kóni Ndios, ta ndúsá'ano ná kee yó noo ndidaá ñayuu. <sup>3</sup> Dá chi ña yó'o kían va'a, ña kían náta'an ini Ndios, na dákaki ñaá. <sup>4</sup> Dá chi kóni na ña ndidaá tá'an ñayuu ni'i ña káki na noo kuachi na, ta nani'i ná ña kana'á ná ña ndaa sa'a mií Ndios. <sup>5</sup> Dá chi iin tó'on diní vá kúu Ndios, ta iin tó'on ta'ani kúu na náchindei va'a ñayuu xí'in Ndios, ta na yó'o kúu Jesucristo, na ni nduu iin taa. <sup>6</sup> Ta ni nakí'o na mií ná ña kían ni xi'i na,

ta k̄i'o dión ni chiya'i na sa'á kuachi ndidaá ñayuu. Ta ndidaá ña yó'o ni kuu tein kuu ni chikaá ini mií Ndios. <sup>7</sup> Ta ni xi'o Ndios choon noo yú'u ña kakuui iin na kasto'on xí'in ñayuu sa'a Cristo, ta kakuui iin apóstol, na kane'e to'on na, (ta ná'á Cristo ña ká'in ña ndaa xí'in ndó, ta kō ká'an to'ón ta'an vai.) Ta ni xi'o ta'ani na choon noo ña dána'i noo na kō kúu na Israel, dá ná kandeé iní na Jesús, ta ná kana'á ná ña ndaa.

### Di'a kánian kee ta kúu ta, ta di'a kánian kee na ñá'a

<sup>8</sup> Ta kónii ña ná ka'an ndidaá ta xí'in Ndios ndeí kúu mií vá noo ndeí ra, ta ná ndane'e ra ndá'a ndaa vii noo Ndios. Ná dá'a ni kuido ini ra, ta ná dá'a ni dándichí tá'an ra.

<sup>9</sup> Dión ta'ani, na ñá'a, ná dá'a ni koo ini na koo táyíí dá'on ná. Di'a ná koo ndúsá'ano na, nda'í ni ná kandixi na. Ná dá'a ni nacho'on táyíí ná diní ná, ná o sa káño'o ña'a oro ndá'a ná, ná o sa kándaki na yuu dión, ni dá'on ya'i ná o sa kándixi na. <sup>10</sup> Va'a kaan luu ná koo na xí'in ña va'a kée na, chí k̄i'o dión kánian kee na ñá'a ndúkú kee ña kóni Ndios.

<sup>11</sup> Ta tádi ní ná kandeí na ñá'a noo dákuá'a na to'on Ndios, ta xí'in ñañó'ó ná kandeí na. <sup>12</sup> Dá chí kō sónó yu'u ña dána'a na ñá'a, ni kō sónó yu'u ña kakomí ná choon satá ta. Sava'a choon sa'ándái noo ná kían ña ná kandeí tádi ná kueídó'o na. <sup>13</sup> Dá chí na mií noo ni kava'a Ndios kúu Adán, ni ndi'i, dá ni kava'a na Eva. <sup>14</sup> Ta kō ní danda'í kirí u'u Adán. Eva va ni danda'í ri. Sa'á ñoó ni kankao Eva noo kuachi.

<sup>15</sup> Tído k̄aki vá na ñá'a sa'á ña xí'o na mií ná kandeí de'e na tá ná kandita toon na xí'in ña kándéé iní na Jesús, tá ná ku'u ini na sa'a ñayuu, tá ná koo vii ná noo Ndios xí'in ña ió ndúsá'ano ini na.

### K̄i'o di'a n̄iyiká kee ta ka'an kane'e choon noo na kúu kuendá Jesús

**3** <sup>1</sup> Miían ndaa kuiti iin ña va'a kían tá kátóo iin ñani yo kane'e na choon ña kían kandaka na na kúu kuendá Jesús. <sup>2</sup> Tído kánian koo vii ná noo ñayuu, ta ná kakuu na yíi iin tó'ón ñá'a, iin ta ñó'o ini noo ña kée na, ta ná kakuu na iin ta ndúsá'ano, iin na ió ñañó'ó ñayuu noo, iin na nátiin va'a ñayuu ve'e na, iin na ti'a va'a dána'a. <sup>3</sup> Ta kō kánian kakuu na iin na kátóo ko'o, ta kō káni ta'anian kakuu na iin na tondó. Di'a kánian kakuu na iin na va'a ini, iin na kátóo koo va'a xí'in ñayuu, ta ná o kakuu na iin na kátóo koo di'ón. <sup>4</sup> Ta kánian kakuu na iin na ti'a va'a dándáki ve'e na, ta ná koo ñañó'ó de'e na, ta ná kueídó'o xi na xí'in ñañó'ó. <sup>5</sup> Dá chí, na kō tí'a dándáki va'a na ve'e na, ¿ndi koo ví kandeé ná dándáki va'a na na kúu ñayuu Ndios ndáka na?

<sup>6</sup> Ta kō kánian kane'e iin na saá, na duú ni nduu kuendá Jesús, choon yó'o, dá chí oon ni ví kasá'á kuryíí ná, ta kankao na ndo'o níó ná kee Ndios tát'on k̄i'o ni ndo'o ña u'u. <sup>7</sup> Ta ná kananí va'a na noo ñayuu kō kúu kuendá Jesús, dá kían ná dá'a ni ni'í ñayuu ndi kee na chínani kini ñaá ná, ni ña u'u o ní'i ndi keean dátúú ñaá.

### Ki'o di'a nýiká kee na ka'án kandita konkuáchí ini ve'e ño'o

<sup>8</sup> Ki'o dión ta'ani kánian kee ra ndíta xíno kuáchí ini ve'e ño'o. Iin ra kéndaa ná kakuu ra, ta iin tó'ón ná kakuu to'on ra. Ta ná o sa kakuu ra iin ra kátoó ko'o, ta ná o sa kakuu ra iin ra kátoó di'ón kuí'íná.

<sup>9</sup> Ta ná koo ini ra tiin toon ra ña ni sa io de'é noo Ndios, ña kíán ña ndaa kándisa yó, ta ná kee ra ña xí'ín ñaxintóni vii. <sup>10</sup> Ta miían ndúsa kánian kande'é va'a ndó ra, dá ná kande'á á kúú rá iin ra kéndisá'ano noo ndidaá ñayuu. Tá dión kíán, dá kíán ná kane'e ra choon yó'o.

<sup>11</sup> Ta dión ta'ani kánian kee na ñá'a, ná kakuu na iin na ndaa, ná dá'a ni kakuu na iin na xínoo káva'a ña to'ón, ta ná kakuu na iin na ño'o ndi'i ini noó ña kée na, ta ná kakuu na iin na ñá'a kándéé inío.

<sup>12</sup> Iin ra xíno kuáchí ini ve'e ño'o, iin tó'ón ní ná kakuu ñadi'í ra, ta kánian ti'a va'a ra dándáki ra ve'e ra xí'ín de'e ra. <sup>13</sup> Dá chi tá kendúsá'ano ra choon yó'o, dá kíán natiin ra ñañó'ó, ta kua'ano cháa ka ra xí'ín tandeé iní kómí rá sa'á ña kándéé ini ra Cristo Jesús.

### Ña yó'o kúú ña ndaa kándisa yó

<sup>14</sup> Táai choon yó'o kosaaan noó yo'ó, va'ará ió tandeé iní ña yachi vá saai kande'í yo'ó. <sup>15</sup> Tído tá ni kueei, dá kíán sa ni kast'o'on vei xí'ón ña kánian keeón xí'ín na kúú ve'e Ndios, chi ñayuu yó'o kúú ve'e ño'o mií Ndios takí, chi kúú ná táto'on di'in ndíta ndío, táto'on di'in ndíta chíndeé ña ndaa sa'á Ndios.

<sup>16</sup> Ta miían ndaa kuiti iin ña ká'ano nda'o kúú ña ndaa kándisa yó, ña ni sa io de'é noo Ndios, ta viti ni na'a naán noo yo, dá chi:

Ni kii Jesús ñayuu yó'o, ta ni sa kuu na iin ta ñayuu,

ta ni kandoo ndaa na ni kee Espiritu ii.

Ta nda induú ni sa nde'é ñaá ángel.

Ta ni dasa to'on sa'a ná noó na ko kúú na Israel.

Ta ni kándisa ñaá na ndéi ñayuu yó'o,

ta xí'ín ñañó'ó ni natiin ñaá Ndios nda noo ió na induú.

### Tein kuu noo ndí'í, dá dána'a dao ta ña to'ón

**4** <sup>1</sup> Ká'an tá'í vá Espiritu ii Ndios ña tein kuu noo ndí'í, dá dánkoo dao ñayuu ña ndaa kándisa yó, dá ko'on na kueídó'o na ña to'ón ká'an espíritu maña, ta ndiko na ña dána'a ta kúú kuendá ña u'u, <sup>2</sup> chi kueídó'o na ña dána'a ta u'u noo, tá'an ra ká'an ndino'o ña to'ón. Ta sa'á ña nadana ñaxintóni ta yó'o, <sup>3</sup> sa'á ñoó o kónó rá tanda'a ñayuu, ta ka'anda ra choon ña ná o keí na dao ña'a, tá'an ña ni kava'a mií Ndios, tído ndidaá na kúú kuendá Jesús xí'ín na ná'a ña ndaa kuu keí ná ña nani naki'o na ndivé'e noo Ndios sa'an. <sup>4</sup> Dá chi ndidaá vá ña'a ni kava'a Ndios kúú ña va'a. Sa'á ñoó ko kánian kañó'ó yó ni iin tó'ón ña'a ni kava'a na. Kuu va keí yoán xían nani naki'o yó ndivé'e noo Ndios. <sup>5</sup> Dá

chì sa'á to'on nì ka'an Ndios, ta sa'á ña náki'o yó ndivé'e noo ná, sa'á ñoó kándoo vii vá ndidaá tá'an ña'a saxío.

### Di'a kánian kee na kóni kechóon va'a noo Jesucristo

<sup>6</sup> Tá ná dána'on ña yó'o noo na kúu kuendá Jesús, dá kían konon kakuuón iin ta kéchóon va'a noo Jesucristo, ta konon kua'ánón noo ña ndaa kándisa yó, xí'ín noo ña ndaa dána'a yo, tá'an ña kándisón nda viti. <sup>7</sup> Ta kánian kañó'ón ndidaá cuento to'ón xí'ín ña ko ndaya'i nákani dao na ñá'a sá'ano. Koo inon ná koo ndakí nimon, dá kandeéon keeón ña kóni Ndios. <sup>8</sup> Dá chí tá ná ndukú yó ña koo ndakí yikí koño yo, cháá vá chindeéán yó. Tído tá ná ndukú yó ña koo ndakí níyo yo xí'ín ña kóni Ndios, dá kían chindeéán yó noo ndidaá ña'a, dá chí chindeéán yó nani ndéi yó ñayuu yó'o, ta xí'oan tandeé iní noo yo ña kandeí yó ñayuu vej chí noo.

<sup>9</sup> Ta miían ndaa ki'o dión kían, sa'á ñoó kánian kandísa ndidaá ñayuu to'on yó'o. <sup>10</sup> Ta sa'a mií ña ndaa yó'o ndí'i ini yo kéchóon yó, ta sa'á míián ndó'o naní yo, dá chí kándéé ká'ano ini yo Ndios takí, na xí'o ña káki ndidaá tá'an ñayuu, ta ñayuu kándísa Jesús kúu na miían ndaa kuiti keva'a xí'ín ña káki na.

<sup>11</sup> Ta kánian ka'andon choon yó'o noo ñayuu, ta kánian dána'on ña noo ná. <sup>12</sup> Ta o sa kónón kenoo na yo'ó sa'á ña ko kúuón iin ta sava'a. Di'a ndí'i inon kakuuón iin ta ndísá'ano, dá ná kande'é na kúu kuendá Jesús yo'ó, dá ná katí'a na kee na ña kóni Ndios. Sa'á ñoó ndísá'ano ka'on, ta ndísá'ano keeón, ta ku'u inon sa'a ñayuu, ta kuiin ndaaon xí'ín ña kándéé inon Jesús, ta koo viion noo Ndios, xí'ín noo ñayuu.

<sup>13</sup> Nani kosaaj, ndí'i inon ka'ávón tuti ij Ndios noo ñayuu, ta ka'an ni'ínón noo ná, ta dána'on noo ná. <sup>14</sup> O sa nándodóon choon ni xi'o Ndios noo, chí mií ná ni xi'o ña ni kandaá ini na sá'ano sa'á choon keeón, sa'á ñoó ni chikodó ná ndá'a ná dinon. <sup>15</sup> Sa'á ñoó ndí'i inon keeón choon yó'o, ta kuiin toon xí'án, dá ná kandaá ini ndidaá ñayuu ndi ki'o sá'ánón kua'on xí'ín ña kándisón. <sup>16</sup> Ta kaon kooón xí'ín miíón, ta kaon kooón xí'ín ña ndaa dána'a yo, ta cho'on inon kuiin toon xí'án. Tá keeón dión, dá kían káki miíón, ta káki ta'ani na seídó'o to'on dána'on.

**5** <sup>1</sup> O sa koo inon dánanón iin na sá'ano, di'a ka'an ni'ínón noo ná xí'ín ñañó'ó táto'on kéeón xí'ín tatá miíón. Ta ka'an ni'ínón noo takuáchí yíí táto'on ki'o kéeón xí'ín ñani miíón. <sup>2</sup> Ta ka'an ni'ini ta'ánón noo na ñá'a sá'ano táto'on ki'o kéeón xí'ín naná miíón. Ta ka'an ni'ínón noo takuáchí di'í takí xí'ín ñañó'ó, xí'ín ñaxintóni vii, táto'on ki'o kéeón xí'ín ki'o kuálí miíón.

### Di'a kánian koo ini yò kee yó xí'ín nà kuáan

<sup>3</sup> Ta koo inon chindeéon nà kuáan, nà kò íin kuií kaá ña nda'í nà.  
<sup>4</sup> Tído nà kuáan ió de'e o de'e ñání, ta yó'o va kánian katì'a xi chindeé xí nà ve'e xi táto'on kì'o kánian kee nà kúú kuendá Jesús, dá nandió né'e xi ña maní noó nà ve'e xi sa'á ña nì ñakuá'ano ñaá ná, chí ña yó'o kían va'a, ña náta'an ini Ndios xiní nà. <sup>5</sup> Ta nà kuáan ndisa, nà kò íin kuií kaá ña nda'í nà, sava'a iin tó'ón mií Ndios kándéé iní nà, ta xíkà nà ña maní noo ná, ta nduú ñoo ká'an nà xí'ín ná. <sup>6</sup> Tído nà kuáan ndéi kée ña kóni ñíi ná, noón kúú nà nì xi'ì noo Ndios, va'ará takí nà ndéi na. <sup>7</sup> Ta ka'andon choon yó'o noo ná, dá kían ná o ní'ì ñayuu ndí kíán ka'an nà sa'a ná. <sup>8</sup> Chí nà kò xító nà kúú tá'an na, ví'í kà ri nà ve'e mií ná, noón kúú nà kò taó kuendá ña ndaa kándísa yó, ta ka'í cháá kà ví kée na o duú iin nà kò kándísa.

<sup>9</sup> Tá kua'on nachikodóon kuu dao kà nà kuáan noo kandodó kuú nà kuáan ndisa, dá kían chikodóon kuu nà ió oni diko kuiá chí noo, ña kúú ná iin nà kuáan nì sa io iin tó'ón yíi, <sup>10</sup> iin nà xí'o ndaa ñayuu kuendá sa'á ña kée na ña va'a, iin nà nì ñakuá'ano va'a de'e, iin nà sa ñatiin va'a ñayuu sa sáa ve'e na, iin nà sa ñakata sa'a ñayuu Ndios, iin nà miían ndaa sa chindeé nà ndó'o níó, iin nà miían ndaa kée ndidaá kà ni ña va'a xí'ín ñayuu xí'ín ná.

<sup>11</sup> Tído o sa chikodóon kuú nà kuáan kualí, dá chí kandeé vá ña kóni mií ná xí'ín ná, ta o taó kuendá ta'on na to'on nì xi'o na noo Cristo sa'á ña katoó tuku na tanda'a ná. <sup>12</sup> Sa'á ñoo tái kuachi na sa'á ña nì xi'o na to'on na noo Ndios, ta kò ní kée na ña. <sup>13</sup> Chí tá ná chikodóon kuú nà kuáan kualí, ta kúú katì'a na kandeí dúsá ná, sa'á ñoo kanoo na tá ve'e tá ve'e. Ta o duú ña yó'o oon ni kee na, chí kanoo na xí'ín ña to'ón ná, ta chinee chituu kakuu na kanoo na ka'an nà ña kò kánian ka'an nà. <sup>14</sup> Sa'á ñoo ká'in ña va'a cháá kà ná tanda'a nà kuáan kualí, ta ná kandeí de'e na, ta ná koo ve'e mií ná dándáki na, dá ná dá'a ni ní'í ña xiní u'u ñaá ndi keean dátuu ñaáán. <sup>15</sup> Dá chí sa nì kankuei xoo va dao nà kuáan kua'an nà xoo ña u'u.

<sup>16</sup> Tá ió iin nà kuáan ve'e nà kúú kuendá Jesús, dá kían kánian chindeé ñaá ná, dá kían ndadá cháá ni choon ná kandido ve'e ño'o, dá ná kandeéán chindeéán nà kuáan, nà kò íin kuií chindeé ñaá.

<sup>17</sup> Di'a kánian kee ndó xí'ín nà sá'ano dándáki va'a noo ndo: koo ñañó'ó ndó noo ná, ta chindeé ndó nà, tído koo cháá kà ñañó'ó ndó noo nà sá'ano dána'a noo ndo, xí'ín nà kásto'on xí'ín ndó sa'á to'on Ndios.

<sup>18</sup> Dá chí di'a kaá tuti ií Ndios: “O sa taán ndo ñono yu'ú chee tá sádi ri tirió, dá ná kuu keí ri chááán.” Ta kaá ta'anian di'a: “Miían ndúsa kánian ní'í rā kéchóon ya'i ra.”

<sup>19</sup> Ta o sa kándíson tá ká'an kuachi iin ñayuu sa'á iin nà sá'ano né'e choon, chí kánian uu o oni kakuu ñayuu ka'an kuachi sa'a ná. <sup>20</sup> Nà kée

kuachi, ta ko kóni na dánkoo naan, dá kían dánanón na noo ndidaá na kúu kuendá Jesús, dá ná yu'ú dao ka na kee na kuachi.

<sup>21</sup> Ta noo mií tatá Ndios, xí'ín noo Jesucristo, xí'ín noo ángel ni kaxi Ndios, yu'u xí'o choon yó'o nooñ ña koo inon ka'andon choon yó'o noo ndidaá ñayuu. Ná dá'a ni kandooón sa'a dao ñayuu. <sup>22</sup> O sa chínóón ndá'on diní ndi ndáa mií ní ñayuu, dá kión choon kane'e na, dá kían ná dá'a ni kandido nduúón kuachi xí'ín ná noo Ndios. Cho'on inon koo viion noo Ndios.

<sup>23</sup> O sa kó'o kaon takuíí oon. Ko'o lú'u vino, dá ná ya'a ña kú'u tiión, chí tóo tóo nda'o kú'on.

<sup>24</sup> Ió dao ñayuu sa natuu va kuachi kée na tá ko ñá'a ví kasandaá kuu keyíko sa'a ná. Tído ió dao ka ñayuu, nda kuu keyíko sa'a vá ná, nda daá ví, dá natuu ndi'i kuachi ni kee na. <sup>25</sup> Kí'o dión ta'ani natuu ña va'a kée ñayuu. Tá'an ña ko ñá'a natuu, o kúu ta'on koo de'é kuií ña, daí ña natuan.

**6** <sup>1</sup> Ndidaá na ñó'o tixi ndá'a iin sato'o, ná koo ini na koo ñañó'ó ná noo rá, dá kían ná dá'a ni ka'an ndava'a ñayuu sa'a kuu Ndios, ni sa'a to'on dána'a yo. <sup>2</sup> Ta na ñó'o tixi ndá'a iin sato'o kúu kuendá Jesús, ná o sa kénóo ñaá ná sa'a ña kúu rá kuendá Jesús. Di'a ná kechóon va'a cháa ka na noo rá, chí káva'a iin ra kúu kuendá Jesús sa'a ña kéchóon va'a na. Ta dión ta'ani kánian kee na sa'a ña kú'u ini na sa'a rá. Ta koo inon dána'on to'on yó'o noo ñayuu, ta ka'an ni'ínón noo ná ná kee na ña.

### **Kánian nata'an iniño xí'ín ña xí'o ña ndaa kándísa yó noo yo**

<sup>3</sup> Ió dao ta dána'a dao ka ña'a, chí ko dána'a ndaa ra tát'on kua'an ña ndaa ni daná'a Jesucristo, na kúu sato'o yo. Ta ko dána'a ra ña ndaa, ña ká'an sa'a ndi kee ñayuu, dá kandeé ná kee na ña kóni Ndios. <sup>4</sup> Dión kée ra, chí ta táyíí nda'o kúu rá, ta ni ña'a ko ná'a rá, ta katóo ra kava'a ra tandó'ó xí'ín to'on ká'an ra, ta katóo ra naá tá'an ra xí'ín to'on. Ta sava'a ña ni'í na seídó'o ñaá kían kásá'a koo u'u ini na kée ra, ta nándaki tandó'ó tein na, ta ndéine'e tá'an na, ta nákaní kuáchi ini na kande'é sátá'an ná. <sup>5</sup> Dándichi tá'an ta yó'o sa'a ña kómí rá iin ñaxintóni maña, ta ni lú'u ña ndaa ko ná'a rá. Ta tiiñ ndaa ra ña ndaa kándísa yó ká'an ra, ta kí'o dión ní'i rá di'ón kekuíká rá mií rá. O sa káne'e tá'ón xí'ín rá.

<sup>6</sup> Tído na kuiká nda'o kúu yó noo Ndios tá ndéi yó kée yó ña kóni na, ta náta'an ini yo noo ña xí'o na noo yo. <sup>7</sup> Dá chí ni iin tó'ón ña'a ko né'e yó ni kasáa yo ñayuú yó'o, ta ni iin tó'ón ña'a o kúu kane'e yó ko'o tá ni xi'i yo. <sup>8</sup> Sa'a ñoó tá ió ña'a kasá'an yó xí'ín ña'a kandixi yó, ná kadii iniño. <sup>9</sup> Tído na ndúkú ña kuiká, noón kúu na kuei noo kuachi, ta natiin ñaá ña kini, chí katóo kini na di'ón tát'on kée na ndeé to'on, ta dár'u'u nda'o ñaá, ta dánkoo nda'í ñaá, ta dánaá ñaá iin kuu. <sup>10</sup> Chí sa'a ña

kátoó téi ñayuu kakomí ná di'ón, sa'á ñoó ndáki ndidaá ña kini ió ñayuú yó'o ini na. Ta kua'á nda'o ñayuu ni kankuei xoo noó ña ndaa kándísa yó sa'á ña kátoó na di'ón. Ta kúu kua'á nda'o tandó'ó ni ndo'o na, ta ni ndo'o nda'o níó ná sa'á ña ni kee na dión.

### **Kánian kandita ndaa yo xí'ín ña ndaa kándísa yó**

<sup>11</sup> Tído yo'ó, ta kéchóon noo Ndios, kuino noo ndidaá ña kini yó'o, ta keeón ndino'o ña ndaa, ta kuiin toon xí'ín ña ndaa kándísa yó, kandeé ká'ano inon Jesús, ku'u inon sa'á ñayuu, kueé ní koo inon, ta nda'í koo inon. <sup>12</sup> Ta ndi'i inon kechóon va'ón sa'á ña ndaa kándísa yó, ta tiin toon ña kataki chíchón noo mií Ndios, chi ni kana na yo'ó ña kían kataki chíchón tá ni ka'on xí'ín ndino'o inon noó kua'á ñayuu ña miían ndaa kuiión xoo Jesús.

<sup>13</sup> Ta noo mií Ndios, na kedaá xí'ín ndidaá ña'a, dá takían, xí'ín noo Jesucristo, na ko ní yu'ú ka'an sa'a mií ná noo Pilato, sa'ándái choon nooon <sup>14</sup> ña koo inon keeón ndidaá kúu choon ni xi'o Ndios nooon, ta o sa yá'ón noo ká'an ña, ta ná dá'a ni kión ña ka'an ndava'a ñayuu sa'an nani kasandaá kuu nandió koo Jesucristo, na kúu sato'o yo, kasaa na. <sup>15</sup> Chi nandió koo na kasaa na tá ná kasandaá kuu ni kaa mií Ndios, na daá kuití kua'a ió, na né'e choon sa'a ndidaá kúu ña'a, na kúu rey noo ndidaá rey, na kúu sato'o noo ndidaá sato'o. <sup>16</sup> Ta iin tó'ón mií ná kúu na daá kuití ió, ta ió na noo náye'e ndaa, ta ko iin ta'on kuu natuu, ta ni iin tó'ón ta'on ñayuu ko ñá'a koni ñaá, ta ni iin tó'ón ná o kúu koni ñaá. Ta daá kuití ná natiin na ndidaá tá'an ñañó'ó, ta daá ná dándáki na ndidaá ña'a. Dión ná koo.

<sup>17</sup> Ta ka'andon choon noó na kuiká ñayuú yó'o, ña kían ná dá'a ni kuryíí ná, ta ná dá'a ni kandeé iní na ña kuiká kómí ná, dá chi ña naá vá kían. Sa'á ñoó va'a cháa ka noo ndá'a Ndios takí ná chikodó ndí'i na tandeé iní na, chi mií ná xí'o ndidaá kúu ña'a xinnó'ó yó, dá ndéi va'a yó. <sup>18</sup> Ta ka'andon choon noo ná ña kían ná kee na ña va'a, ta ná ndukú ná ña koo kuiká ná xí'ín ña va'a kée na. Ta ná chindeé ná ñayuu kúnda'í xí'ín ña ió noo ná, ta ná kemáni va'a ñaá ná. <sup>19</sup> Dión kánian kee na, dá kían koo kuiká ndisa na iin ka ñayuú vei chí noo, dá natiin na ña kataki chíchí ná.

### **Ña yó'o kúu choon noo ndí'i sa'ándá Pablo noo Timoteo**

<sup>20</sup> Ká'in xí'ón, Timoteo, ña koo inon kanda va'ón choon ni ta'anda nooon, ta keeón ña. O sa koo inon kueídó'ón noó ndéi ñayuu ndátó'ón sa'á to'on ko choon, xí'ín na ndátó'ón sa'á ña chinaní ná kúu ña ndichí ió ñayuú yó'o, chi ko ta'ón dión kían. <sup>21</sup> Ta sa'á ña ni xi'o dao na mií ná ni ndátó'ón ná sa'a to'on yó'o, sa'á ñoó ni kankuei xoo na noó ña ndaa kándísa yó.

Ná koo ña maní xí'o Ndios xí'ín yo'ó. Dión ná koo.